



# ADAVANE!


Revuo oficala di la Ido-Societo Hispana



Novembro - decembro 2007 - [idosocietohispana@yahoogroups.com](mailto:idosocietohispana@yahoogroups.com) - numero 24




La marnavo  
**LACONIA**



**MERHAMEH**



**TURANDOT**



La kemio  
di la vivo

## Adavane!

Adavane ! Numero 24, novembro-decembro, 2007. Editita en Hispania. Gratuita revuo. Adavane! esas oficala organo di la Ido - Societo Hispana ( adreso postala di la societo: Claveles 6, E-24400 Ponferrada, Hispania; interretala adreso di la societo: [idosocietohispana@yahoogroups.com](mailto:idosocietohispana@yahoogroups.com) ). Redakteri: La Direktanta Komitato di la Ido-Societo Hispana ed altra kunlaboranti internaciona. Editero: Editerio Krayono, di la ISH.

Adavane! nulakaze responsas pri la opinioni da artiklo-skribisti nek pri la verdicemeso di la texto di la artikli publikigita, ma sua autoro, qua oblige signatas singla artiklo sendita da lu por publikigo. Nula artiklo anonima publikigesos en Adavane!

## Kunlaborez

Kunlaborez e sendez publikigebla artikli en Idolinguo, od en la Hispana pri Idala temi, a la Internet-ala postobuxo di la I.S.H: [idosocietohispana@yahoogroups.com](mailto:idosocietohispana@yahoogroups.com) . Adavane! havos irgakaze la yuro publikigar la sendita artikli o ne publikigar oli. Adavane! esas gratuita revuo, do Adavane! nulakaze pagas la artikli o verki sendita por publikigo, nam irgu ya aceptas sendar oli gratuite. Anke la redakteri multe prizus vua kritiki e sugesti.

## Ret-pagino di la Ido - Societo Hispana

IdoHispania <http://www.idohispania.org.es> esas ret-situo, en Ido ed en la Hispana, di qua skopo esas konocigar la linguo internaciona Ido a ti qui parolas la Hispana.

## Publikaji

“Publikaji” ( <http://es.geocities.com/krayono/publikaji.html> ) esas ret-pagino di la Ido-Societo Hispana. Volunteez enirar olu por trovar gratuita edituri: Adavane!, Kuriero Internaciona; Radio-Idia Internaciona; pdf-libri, Ido-kursi, dicionarii, gramatiki...

## Kartuno



*Texto insertita da Fernando Tejón.*

## Kontenajo di la numero 24

<b>Adavane.....</b>	<b>2</b>
<b>Kunlaborez.....</b>	<b>2</b>
<b>Ret-pagino di la Ido-Societo Hispana.....</b>	<b>2</b>
<b>Publikaji.....</b>	<b>2</b>
<b>Kartuno.....</b>	<b>2</b>
<b>Vorto da la editero.....</b>	<b>4</b>
<b>Reklameyo.....</b>	<b>6</b>
<b>Kuriero Internaciona.....</b>	<b>6</b>
<b>Lo mikra es bel.....</b>	<b>6</b>
<b>Merhameh.....</b>	<b>7</b>
<b>La kemio di la vivo.....</b>	<b>9</b>
<b>La marnavo "Laconia".....</b>	<b>11</b>
<b>Turandot.....</b>	<b>14</b>
<b>Introdukto.....</b>	<b>14</b>
<b>Rezumo.....</b>	<b>27</b>
<b>Rolaro.....</b>	<b>17</b>
<b>Akto I.....</b>	<b>18</b>
<b>Akto II.....</b>	<b>42</b>
<b>Akto III.....</b>	<b>60</b>
<b>Klasika mondo.....</b>	<b>76</b>
<b>Ludeyo (Sudoku).....</b>	<b>77</b>
<b>Rideyo.....</b>	<b>78</b>
<b>Averto lektenda pri la autoro-yuri.....</b>	<b>79</b>
<b>Adio!.....</b>	<b>79</b>

## Vorto da la editero

Yen itere nova numero di ta revueto interretala, la 24ma numero. Ye januaro 2004 rinaskis, pos silenco durinta yardeki, la revuo Adavane. De ta unesma numero esis por me laboro importanta e neajornebla publikigar maxim akurate ta rekvo di la Ido-Societo Hispana, e me satisfacis mea promiso dum ta quar yari, sempre publikigesis sen tardeso singla nova numero di Adavane.

Me savis nulo pri interretaji e pri editar e publikigar revui en la "mondala reto" qua proximigas mem la habitanti di maxim distanta landi. Ma tatempes nula muro esis tro alta por transsaltar olu. Kun la helpo de interreto e de mea libri me sucesis desaparigar desfacilaji e richigar plurateme mea savo. Advere sempre ke me askoltas o lektas questiono di qua unesma vorto esas "quale" e me ne savas respondizar olu me... joyas, lo esas invito por serchar libro di qua pagini volas nepaciente savigar da la lektanto, da me takaze, la respondo maxim apta, e kustumale la libri donacas a la lektero plu multa respondi kam lu serchis unesme. Tale omna artikli da me naskis kom respondo a questiono, exemple, aeroplano fluganta super plajo igis mea mento flugeskar dum ke mea korpo duris repozar sur la orea sablo, e de ta muta observado, revo somerala, naskis la questioni quin libri ed interreto respondizis. E de to omno mikra parton me publikigis kom artiklo (La "autogiro") en Adavane, ne por la lektaro ma kom rezumo de mea inuesti. Ye multa tempo ante nun me decidis ne krear Adavane por la lekteri ma por me ipsa, me juas krear olu, naskigar olu, ma pos la publikigo, pos la nasko, singla nova numero ne plus esas interesanta por me, olu esas por me la fino di inuesto, di voyo traerita, e la komenco di nova ed emociganta voyajo inquestala en diferanta tereno. Esas nombroza la tereni vizitinda, ma la vivotempo di un persono ne suficas por vizitar mem mikrega parto ek oli maxim regretinde; "me ne havas suficanta tempo..." dicis plurafoye la yuna Évariste Galois dum lua lasta nokto ante la jernesko e la neevitebla morto, sama vortin me pronuncas, fortunoze ne ante anuncita mortokloko ma cirkondita da centi de libri qui til nun vane vartas kareco de mea manui e rivivigo de lektema okuli, e da ula projeti abandonita. Me bezonas plusa libera tempo por ta libri e projeti "obligita" qui meritas mea atenco, ma nunatempe Ido okupas preske omno e kompreneble me nulakaze furtus la tempo di mea familio. Do me devas mikrigar mea tempo por Ido, mem desaparigar olua "rigideso". Ta rigideso esas preske sama kam olta di la pelo di la artropodi. Certe ta rigida pelo protektas lua interna proprietanto, ma interdiktas lu kreskar. Se artropodo volas kreskar unesme lu devas desmetar lua pelo, e ja sen ta protektiva kovrilo lu povas kreskar, juar la libereso, e fine krear nova pelo qua protektos lua korpo grandigita. Sendube dum ta tempo senpela, la artropodo ne havas lua shildo do omna malajo esas possiba, mem mortigo da la devoristi, ma onu devas aceptar ta risiko se onu volas kreskar.

Mea rigida pelo esas nunatempe Adavane. Me ne intencas tedar vi kun plusa expliki tarelate. Simple me savigas da vi ke ta numero di Adavane esas la pre-lasta numero quan Editerio Krayono, to esas, me ipsa, publikigas. Ye la unesma di januaro 2008 me publikigos la lasta numero, la 25ma, qua inkluzos komentata indexo finala di omna numeri di Adavane publikigita da me, ma nula plusa artiklo. Fino. Editerio Krayono desligesas de irga organizuro e duras, o cesas, lua laboro libere.

Plura personi helpis me dum mea ofico kom editero di Adavane. Evidente me gratitudas la valoroza helpo di la membra di la Ido-Societo Hispana. Lia artikli e helpo sempre kurajigis me, e me konfesas ke ula artikli da mea samsocietani deskovris "nova mondi" maxim interesiva por me. Anke me devas dicar ke recente, pro privata aferi, mea samsocietani ne povis esar tre kunlaborema, ma nulu devas obliviar ke unesme onu devas atencar la familio, la laboro ed altra importanta privata aferi. Ido esas kompreneble duesmaranga kompare ta privatagi. Danko, ISH-ani. Anke plura personi ne membra di la Ido-Societo Hispana kunlaboris, mem ne Hispani. Me preferas ne dissavigar hike lia nomi pro ke sendube mea memoro oblivious nevolunte ula nomi, e lo tristigus ta "obligita" personi. En la numero 25ma di Adavane me inkluzos la nomo di omna kunlaboranti. Irgakaze me gratitudas lia kunlaboro, prefere olta da ti qui maxim reguloze kunlaboras. Danko, sincera danko. Ed anke me devas parolar pri ti qui povis ma ne volis kunlaborar e pri ti qui volis ma ne povis kunlaborar, bone, adminime inter li esas ula lekteri qui prizas singla nova numero publikigita; lo anke esas gratitudinda.

Adio!

**Fernando Tejón.**



## Reklameyo


### Kuriero Internaciona

Por lektar interesiva artikli en bela stilo  
 Idala volentez abonar la revuo da nia franca  
 samideano Jean Martignon:

#### "KURIERO INTERNACIONA"

Ta revuo publikigesas ye singla trimestro.  
 La chipa yarala abono esas 10 €.

Internet-adreso: [martignon.jean@wanadoo.fr](mailto:martignon.jean@wanadoo.fr)  
 Postala adreso: *Jean Martignon,  
 12 rue Maurice Utrillo,  
 F-91600 Savigny sur Orge,  
 France – Francia.*



### Lo mikra es bel

Kar amiki,

Me joyas anunciar ke me rivivigis Editerio Sudo (ES), hemal editerio fondita en 2002. Por celebrar la jubileo di Ido ES jus editis la sequanta libreto:

Gonçalo Neves: *Lo mikra es bel. Esayeto pri la esenco di Ido.* Seplingua edituro. Tradukita al Angla (Robert Carnaghan), Franca (Jean Martignon), Germana (Günter Schlemminger), Hispana (Eduardo Rodi), Italiana (Fernando Zangoni) e Rusa (iZoommm, alias Ivor Vinogradov). Montijo: Editerio Sudo. 28 p. 10,5 x 14,8 cm (A6), riche ilustrita. ISBN 978-972-8551-03-2

Ica jubileala libro ne aparos en la reto e ne esas komprebla. ES sendos ol gratuite ad irgu qua demandos lo. La tradukinti evidente ne bezonas demandar lo.

Por demandar la verko suficas sendar kurta mesajo kun vua postal adreso al editerio [edisudo@clix.pt](mailto:edisudo@clix.pt) od al autoro [g-neves@clix.pt](mailto:g-neves@clix.pt) o SMS (+351 916 084 297). On povas agar lo anke per lenta letro sendota ad:

Editerio Sudo  
 R. Camilo Castelo Branco 34, 4 Dt  
 PT-2870-015 Montijo  
 Portugal

Me pregas la redakteri di Ido-revui insertar la supra anuncio, se posibla. Me predankas.


Kordiale,  
 Gonçalo Neves

## MERHAMEH, voyajala rakonto da Karl May

Recente Karl-May-Verlag, Bamberg / Karl-May-Haus, Hohenstein-Ernstthal publikigis libro di qua autoro esas la famoza skriptisto Karl May. Advere lo ne devus esar surprizo nam la verko da May (1842-1912) duras esar lektinda e sucesas atraktar nova lekteri, yuna lekteri ma anke adulti. Ne nur la Germana lekteri prizas la libri da May. Omna rakonti da May tradukesis aden la maxim importanta lingui e danke ta tradukuri milioni de lekteri povas juar la aventuri di Old Shatterhand e lua amiko indijena Winnetou en la westo di Nord-Amerika, ma anke la aventuri di Kara ben Nemsi e Halef Omar en la exotika Oriento. To quo esas surprizo, tre agreabla surprizo, esas la linguo di la recenta libro publikigita, plu bone dicita, la lingui: Ido e Germana. En la sama libro onu povas lektar la originala verko da May ma anke tradukuro aden la linguo internaciona Ido da Alfred Neussner. Duopla plezuro!

Unesme me dankas André Neubert, direktoro di la Karl-May-Haus (Domo), pro ke lu sendis postale a me exemplero di la libro titulizita MERHAMEH:





**MERHAMEH**  
VOYAJALA RAKONTO DA KARL MAY  
Reiseerzählung von Karl May

**MERHAMEH**

VOYAJALA RAKONTO DA  
KARL MAY

Du-lingua edituro Ido-Germana.  
Tradukuro aden Ido da **Alfred Neussner**. Epilogo da **Hans-Dieter Stneimetz**. Kovrilo da **Peter Schnorr**. Ilustrita da **Arthur Lewin**.

© 2007 Karl-May-Verlag, Bamberg /  
Karl-May-Haus, Hohenstein-Ernstthal.

Grandeso: 11 \* 17,4 cm. 64 pagini.  
Preco 9,95€. ISBN: 978-3-7802-3031-7

<http://www.karl-may-haus.de/index.php?ac=merh>

Pos apertar la papera kovrilo me ektiris libro belaspektanta, kun kovrilo da Peter Schnorr, la bela desegnuro kolorizita esas invito por ne plus ajornar la lekto, por nemediate enirar exotika lando di beduini e deskovrar, guidata da May, pro quo li portas paf-armi, pro quo li observas de celeyo la forpasanti, pro quo...

Me foliumas la libro. Maxim regretinge me ne povas juar la texto originala en la Germana, ma maxim fortunoze la tradukuro aden la linguo internaciona Ido posibligas ke me enirez la mondo orientala di May. Kompreneble me ne povas judikar ka la tradukuro esas fidela a la originala texto da May. Anke ne me darfias judikar la qualeso linguala di la tradukuro, lo esus ridinda, kad Idolernanto darfias judikar laboro da experiencoza Idisto, da Idisto ne recenta ma dum yardeki? No. Ma me ya darfias retroirar a mea yunevo e lektar ta libro kun la sama atenco, kun la sama revema stando quan me havis kande me lektis libri da Jules Verne.

Qualesa parerofolii. Joyoze la texto esas preske nuda, la nombro de ilustruri insertita esas mikra, e lo esas gratitudinda pro ke me prizas ne fotografaro ma libro, dum lekto mea mento imaginas la personi, lia vesti, lia aspekto, lia voci, anke me imaginas la peizajo, e c. Yen pro quo plurafoye spektar filmo bazata en lektita libro esas kelke deceptanta, precipue la aspekto e la voci di la aktori. Fortunoze la editero, saje meaopinione, ne limitizas la imagineso di la lektero, nur invitás lu lektar.

E komencas la lekto. Unesme me lektas la epilogo da Hans-Dieter Steinmetz por savar pluse pri May e generalaji pri lua verki. Kande mea okuli lektas la vorto "Merhameh", inicala vorto di la prelasta paragrafo me klozas la okuli e la lekto cesas. Tote ne me volas savar ulo pri la rakonto lektota, me volas trairar foresto virga, ne agro plugita. Ye la sisesma pagino stacanta Kara Ben Nemsi invitás me lekteskar la rakonto, sendube lu vartas mea finala opinono pri la rakonto.

Pos lektar la rakonto (suficas horoquarimo, ma volontez lektar olu lente, ne glutez ma savurez la rakonto) semblas a me ke oltan me ja lektis ye mea adolecanteso, ma sen konciar ke la autoro esis May. Irgakaze me multe juis la rakonto. Kompreneble me devas savigar nulo pri la rakonto ipsa, irga lektero deskovrez to quo celas la vorti da May tradukita da Neussner aden la linguo Ido. Qua esas Merhameh? Enirez la libro e juez ta orientala rakonto, ti qui savas la Germana juez olu duople, sendube me rekomendas komprar e lektar ta libro.

Fine me ne volas finar ta artiklo sen gratitudar la kulturala laboro di la Karl-May-Haus ([www.karl-may-haus.de](http://www.karl-may-haus.de)) e sen gratular Alfred Neussner pro ke lua lektinda tradukuro helpas diskonocigar mem pluse la verko da May, ma richigas la literaturo Idala olqua sempre bonvenas nova valoroza verki.


Esez la volo di Allah, la sempre yusta, ke plusa verki da May tradukesez aden Ido, esez anke la volo di Allah, la unika Deo existanta, ke nia vivo esez sat longa por juar oli.

As-Salāmu `Alaykum (السلام عليكم).

*Fernando Tejón.*

## La kemio di la vivo

125 yari ante nun mortis la Germana natur-exploristo  
Friedrich Wöhler




**Friedrich Wöhler**

Komence la 19esma yarcento la ciencisti du-partigabis rigoroze la naturo: a la sen-viva kozu unlatere e la vivanta enti altralatere. Por to la tale-dicita vitalismo furnisis la teorio filozofiala, qua atribuis ad omna planti ed animali ula misterioza povo (vis vitalis). Sen ica povo, tale on dicis, nultempe povus genitesar substanco organika ek ne-organika ingredienti.

Tale unesme pensis anke la Germana kemiisto Friedrich Wöhler, qua ye la 3lesma di julio 1800 naskis en Eschersheim proxim Frankfurt (Main). Il studiis medicino en Marburg e Heidelberg. Pose il voyajis por un yaro a la famoza Suedana ciencisto Jöns Jakob Berzelius a Stockholm por profundigar sua savo koncerne la

analitikala kemio. Depos 1825 Wöhler docis en la "Gewerbeschule" (manufaktur-skolo) en Berlin e hike 1828 il nominesis kom profesoro. Dum la sama yaro il sucesis facar importanta deskovro, quale il konfidencis letre a Berzelius ne sen fiereso: "Me devas dicar a vu, ke me povas produktar ureo sen bezonar por to reni od entote animalo, nek homo nek hundo." En klara texto: Wöhler transduktabis per varmegigado la ne-organika kombino amonio-cianato ad organika ureo e tale, quale Justus von Liebig plu tarde interpretis, fundamentizabis la ciencala organika kemio.

Wöhler e Liebig – ca nomin on citas hodie ofte samtempe. Tamen esis tempo, kande amba exploristi atakis forte l'una l'altra. Esis cirkum 1820, kande generale valoris la principio, ke substanci kun sama kompozo kemiala anke posedas la sama atributi. Pro to la



analizo di arjento-cianato, quan Wöhler 1822 exekutis, duktabus koaktate ad altra rezulto kam la analizo di arjento-fulminato, quan Liebig exekutis en la sequanta yaro. Nam fulminati e cianati prizentas diferanta atributi. Tamen amba analizi realigis la sama kompozo, pro quo Liebig reprochis a sua kunfrato, ke ilti laborabis ne-ordineme. Ma kelke plu tarde ja l'exploristi povis interpretar la remarkinda fenomeno: Tale quale per diferanta kombinuro di literi genitesas diversa vorti, tale la diferanta kombinuri di atomi rezultas diferanta substanci. Por exemplo esas  $\text{HOCN}$  = cian-acido e  $\text{HCNO}$  = deton-acido. La kemiisto qualifikas co kom izomero, pos qua deskovro Wöhler e Liebig divenis amiki por la tota vivo. Kune li publikigis pri benzoe-acido, bitra-mandelo-oleo e kemiala radikali, e kune depos 1838 ili editis la "Annalen für Chemie und Pharmacie", la lore maxim importanta kemiista revuo di la mondo.

Ma anke kom singulara luktero Wöhler esis extreme sucesoza: Unesmafoye il izolis l'elementi aluminio e berilio en pura formo. E nur pro venenizuro en la laboratorio il ne divenis la deskovrero di l'elemento vanadio. Per sua laboruro pri kalcio-karbido il pozis la fundament-stono por la rapide adsupre tendencanta karbid-industrio e la autogenala weldado. Il developis metodo por la produktado di fosfo, qua ankore hodie esas uzata. Mem kelkfoye Wöhler karakterizesas kom prima patro di la mi-konduktala tekniko, pro ke 1856 il unesmafoye produktis kristala siliko. Il kompozis multa manu-libri pri organika e ne-organika kemio, qui rapide divenis klasikaji. Mem nia omna-dia idiomon la des-kovristo di l'ureo-sintezo richigis, da lu venas la parolo: "Probieren geht über studieren" (probar esas plu bona kam studiar).

En la yaro 1831 Wöhler livis la "Berliner Gewerbeschule" e docadis til 1836 en la "Polytechnikum" en Karlsruhe. Pose il iris kom profesoro por kemio e farmacio al universitato Göttingen, a qua il esis devota til sua morto. Il mortis ye la 23esma di septembro 1882 evanta 82 yari.

Ek "Neues Deutschland" da Martin Koch

*Tradukuro da G. Schlemminger*



## La marnavo "Laconia"



H.M.S. Laconia

Ye la 12esma di agosto 1942 la Britana pasajer-navo "Laconia" transformita kom militala transporto-navo departis de la Egipta Suez por navigar preter la sudala pinto di Afrika a la Britana Insuli. Ye bordo trovesis cirkume 2700 personi, inter li 1800 Italiana milito-kaptiti, gardita da 103 Polona soldati, e 280 Britana militarani e proxime 80 mulieri ed infanti. Preske akurate samtempe kin

Germana navi submara livis lia bazi an la Franca Atlantika rivo. Admiralo Karl Dönitz imperabis li a la marala spaco proxim Kapstadt en Sud-Afrika. Dum la voyo a la sudo la U 156 komandata da kapitan-lietnanto Werner Hartenstein renkontris la "Laconia" sole naviganta en Atlantiko e torpedagis olu vespere ye la 12esma di septembro – des-estimante la Londona navar-protokolo de 1936, quan anke Hitler-Germania signatabis.



Hartenstein

Hartenstein nun anke des-estimis Germana milit-impero komencinte salvacione e per apertita radiotelegrafado serchis helpo internaciona. Antee il propozabis a Dönitz diplomacala neutrigeso di la sinkigo-domeno por salvar sekure omna sur-vivanti. Pro l'informo ke tante multa resortisanti dil axo-partenero Italia koncernesis, Dönitz sendis tri submara navi por sokurso. Tamen Hitler, qua evidente timis reprochi da Mussolini, opinionis Hartenstein devabus celar la afero e simple for-plunjar.

Hartenstein ne saveskis, ke sua propozo relate neutrigeso rekuzesis da Berlin kom "unmöglich" (ne-posible). La Amerikani, des-instruktita, sendis avioni kontre la submara navi, qui ja aceptabis multa sur-vivanti o per remorko-kablo tirabis lia bateli. Ye la 16esma e 17esma di septembro li atakis malgre videbla redkruco-flago sur U 156 la navi, qui esis okupanta pri salv-labori. Ensemble 1600 homi mortis.



La submarnavo U-156, kun videbla redkruco-flago, atakesas dum salvolabori da Amerikana avioni.



*Kapitan-lietnanto Werner Hartenstein kun  
lua submarnavani sur lia navo, la U-156.*

Ja ye la vespero di la 17esma di septembro Dönitz proklamis la tale-dicita "Laconia"-impero, qua interdiktis omna salvacioni. On devus salvar naufraginti nur, se on espektas importanta enuncaji da li. Per to ankore ante Goebbels la admiralo donis signalo por la miliro totala.

Artiklo da Martin Koch, ek "Neues Deutschland"

### ***Tradukuro da G. Schlemmer***

#### **La texto di la Laconia-impero**

1. Ne eventez irga esforci por salvar resortisanti di submersigita navi, do anke la peskado di natanti ed admiso aden salvo-bateli, l'erektao di renversita salvo-bateli, libro di nutrivi ed aquo. Salvado kontre-dicas la maxim simpla postulati di la strategio, nome nihiligar enemikala navi e la navanaro di ti.
2. L'imperi relate kaptar komandanti e chef-injeniori durez existar.
3. Salvez naufraginti nur en kazo, se importanta enuncaji pri la navi esas expektenda.
4. Restez ruda, reflektez, ke dum bomb-ataki kontre Germana urbi l'enemiko esas sen-egarda kontre mulieri ed infanti.

Per la Laconia-impero divenis videbla la popul-yura problemo di la miliro per navi submara. La konvencioni internaciona segun popul-yuro lore pre-aranjis marala miliro nur segun la konvencioni di ula krocnavo-miliro, ma ne admisis marala miliro per navi submara. Navi submara ne havis la possiblaji di kroc-navo suciegar pri naufraginti. Tamen la navani di la navi submara kreskesis ed edukesis segun ca konvencioni e talmaniere agis anke pos la Laconia-impero.



*Großadmiral Karl Dönitz*

Admiralo Chester Nimitz dicis pri ca temo koram la tribunalo en Nürnberg, ke Amerikana navi submara en la Pacifiko agis segun la sama imperi. Quankam ca "tu quoque" (tu anke) ne povas fundamentizar yuro, malgre to esis forta argumento por la advokato di Dönitz, Kranzbühler, nam il povis argumentar, ke la Laconia-impero di Dönitz la ocidon di naufraginti nek imperabis, nek aranjabis, nek rekomendabis a la komanderi. Kontree l'impero asimilabis su a la konvencioni di altra militanta nacioni e do esis emisita konforme a la konkordo popul-yura. Pro to 1946 dum la Nürnbergga Tribunalo kontre la chef-krimineri militala la Laconia-impero kontributis nulo por la kondamno di Dönitz pro krimini militala.

La Internaciona Tribunalo en Nürnberg kondamnis Karl Dönitz a 10 yari karcero, quin il subisis en la karcero por krimini militala en Berlin-Spandau.

Ek la Germana "Wikipedia".

#### *Tradukuro da G. Schlemminger*

### **Der Wortsaut des Laconia - Befe hls**

1. Jegliche Rettungsversuche von Angehörigen versenkter Schiffe, also auch das Auffischen Schwimmender und Anbordgabe auf Rettungshoote, Aufrichten gekenterter Rettungshoote, Abgabe von Nahrungsmiteln und Wasser haben zu unterbleiben. Rettung widerspricht den primitivsten Forderungen der Kriegsführung nach Vernichtung feindlicher Schiffe und deren Besatzungen.
2. Die Befehle über das Mitbringen von Kapitänen und Chefingenieuren bleiben bestehen.
3. Schiffbrüchige nur dann retten, wenn ihre Aussagen für das Boot von Wichtigkeit sind.
4. Bleibt hart. Denkt daran, daß der Gegner bei seinen Bombenangriffen auf deutsche Städte keine Rücksicht auf Frauen und Kinder nimmt!

## Turandot

### Introdukto

Opero en tri akti kun muziko da Giacomo Puccini (1858 – 1924) e texto da Giuseppe Adami e Renato Simoni. Desfortunoze Puccini mortis pro laringo-kancero ante finar la opero, qua kompletigesis da Franco Alfano. La unesma reprezentado eventis ye la 25ma di aprilo 1926 en "La Scala" di Milano. La ario "Nessun dorma" di la triesma akto esas tre populara, konocata mem da ti qui savas nulo pri opero.

Turandot esas nomo Persa qua signifikas "filiino di Turan". Turan esis regiono di Centrala Azia, parto di la Imperio Persa. Segun poemo da Nezami titulizita "La sep princini", Persiana princulo havis che lu sep princini, singla veninta de diferanta landi di la imperio: Egiptia, Chinia, Rusia, Grekia, Turkia, India e Centrala Azia. Por elta veninta de Rusia, nula viro esis apta kom spozo, do elu decidis refujar en kastelo e nur acceptar kom spozo ta qua esas kapabla solvar plura enigmati, ma pluse la kandidato devas transirar "sekreta pordo protektita da misterioza espadi qui minacas senkapigar la audacoza eniranto".

Ta poemo esis la inspiron literaturala por la Franca skriptisto François de la Croix, di qua plumo kreis rakonto pri kruela princino Chiniana di qua nomo esis "Turandokht". Lu selektis Chinia vice Rusia kom lando di la princino por grandigar la exotikeso di la rakonto, qua publikigesis kun altra rakonti en libro titulizita "La mil e un jorni" (samatempe Antoine Galland tradukis e publikigis la rakontaro "La mil e un nokti"). La rakonto pri la China princino inspiris Carlo Gozzi qua kreis tragikomedio, olqua esis la inspiron por la poeto Germana Friedrich Schiller. La texto Italiana di la opero Turandot bazesas en tradukuro de la verko da Schiller.

Puccini komencis la laboro pri la opero Turandot ye marto 1920, pos renkontro kun Giuseppe Adami e Renato Simoni, skriptisti de texti por operi. Ye marto 1924 nur mankis por kompletigar la opero olua parto finala, qua ne plezis Puccini. Do lu komendis de Adami nova texto (la 4ma) por ta parto. Selektita fine la apta texto, Puccini rikomencas la laboro ye la 8ma di oktobro. Ye la 10ma di la sama monato la mediki diagnozis laringo-kancero, olqua mortigas Puccini ye la 29ma di novembro. Pos la morto di Puccini, Franco Alfano finis la opero.

La opero Turandot reprezentesis unesmafoye ye la 25ma di aprilo 1926 en La Scala di Milano, la kantisti esis: Rosa Raiza (Turandot), Miguel Fleta (Kalaf), María Zamboni (Liu), Carlo Walter (Timur), Giacomo Rimini (Ping), e c. Proxim la fino di la triesma akto, pos la vorti "Liu, poezio!", la orkestro haltis, la orkestrestro, Arturo Toscanini, abasis la vergeto, turnis su a la spektanti e dicis: "Hike finas la opero pro ke hike la Maestro mortis". La kurteno abasesis lente. Pos ta unesma reprezentado sempre inkluzesis la finalo da Alfano.

# Turandot


opero da

**Giacomo Puccini**

texto da

Giuseppe Adami e Renato Simoni

tradukuro aden Ido da Fernando Tejón



## Rezumo

### Akto I

Olima urbo Beijing. Koram populo, proxim la Interdiktata Urbo, mandareno lektas edikto: irga princulo qua volas spozinigar la princino Turandot devas solvar tri enigmati, altrakaze ilu mortigesos. La lasta kandidato, la princulo di Persia, mortigesos ye la aparo di la luno. La urbani, kun granda sango-avideso, demandas a la mortigero finar la vivo di la desfortuna princulo. Inter la spektanti esas la yuna sklavino Liu, qua pregas helpo nam lua evoza mastro pulsesis e faligesis a la sulo. Belaspektanta yunulo rikonocas ta oldulo kom ilua perdita patro, Timur, la vinkita rejo di Tataria. Kande la oldo dicas a lua filio, la princulo Kalaf, ke nur Liu duris esar fidela a lu, la yunulo questionas ad elu pro quo elu tale agis. Elu respondis ke pro ke ye multa tempo ante nun Kalaf ridetis ad elu. La turbo itere demandas sango, ma la luno videbleskas e nemediate la silenco regnas. La kondamnito marchas a la mortigeyo, e dum ilua marchado la spektanti emocigeskas e suplikas a Turandot la pardonon por la princulo. Turandot aparas e per despriziva gesto imperas mortigar ilu. La turbo askoltas morto-ploro de fora disto. Kalaf, surprizita da la beleso di la princino, decidias spozinigar elu. Ilu avansas a la tamtamido di qua sono dissavigas la arivo di nova kandidato. La ministri di la princino, Ping, Pang e Pong kun Timur e Liu volas deskurajigar la princulo, ma malgre lia supliki, Kalaf frapas la tamtamido ed advokas Turandot.

### Akto II

En lia chambri, Ping, Pang e Pong lamentas la sangoza regnado da la princino ek glacio, e li suplikas en lia pregi ke la amoro fine konquestez elua glaciigita kordio e tale itere venus la paco a la imperio. La ministri oblivious lia revi e retrovenas a la reala mondo kande li askoltas la klami di la turbo qua volas askoltar la questioni a la nova kandidato. La olda imperiestro Altoum, sidanta sur la alta trono di la Imperiala Palaco, questionas a Kalaf ka lu volas renunciar lua kandidateso, ma vane. Turandot rakontas to quo eventis pri elua avino Lo-u-Ling, elqua asasinesis da vinkinta princulo. Kom venjo Turandot repulsas la viri, e decidis ke nulatempe viro esos lua mastro. Elua unesma questiono esas: Quo naskas singlanokte ma mortas ye singla jorneysko? "Espero", respondas Kalaf. Tote surprizita pro la korekta respondo, Turandot savigas da la princulo la duesma questiono: Quo esas reda, palpitanta e varma same kam flamo, ma ne esas fairo? "Sango", respondas Kalaf pos mikra pauzo. Itere korekta respondo surprizas e desquieteskas Turandot, elqua savigas da la princulo la triesma e lasta questiono: Quo esas glacio ma samatempe esas tam

inflamanta kam fairo? Kun angoro, silence, onu vartis la respondo da la princulo. Fine ilu klamis: "Turandot!". La princino vane suplikas a lua patro ke lu ne abandonez elu ye la brakii di la exterlandano. Kalaf, maxim jeneroze, propozas a Turandot enigmato da ilu: Se elu deskovras ilua nomo ante la jornesko lore ilu renuncas ilua vivo.

### Akto III

En la gardeno di la palaco, Kalaf askoltas proklamo: sub minaco de morto-puniso nulu en Beijing dormos (la famoza ario "Nessun dorma") til ke Turandot savos la nomo di la exterlandana princulo. Ilu ja revas pri lua proxima vinko, ma Ping, Pang e Pong probas, mem per suborno, konvinkar lu por ke lu forirez. La soldati kaptas Liu e Timur, qui supozeble savas la nomo. Onu minacas uzar la tormento por deskovrar la sekreta nomo. Kalaf klamas ke nur lu ipsa konocas la nomo, ma Turandot imperas ke Timur parolez e savigez da elu la nomo di la princulo. Liu ploreskas e dicas a la princino ke nur elu savas la nomo di la exterlandano, ma nulakaze dissavigesos. Turandot imperas Liu dicar la nomo, ma la yunino nur respondas: "Amoro". Kande la tormento esas vinkonta Liu, elu deprenas la poniardo di apuda tormentanta soldato e suocidas. Elua korpo akompanesas a la exterajo da Timur e la turbo.

Kalaf embracas Turandot ed obligas elu kisar lu. Elu unesmafoye konocas la amoro ed emocigita ploreskas. La princulo savigas da elu ilua nomo. Turandot proximigas su a la trono di la imperiestro e dissavigas la nomo di la exterlandana princulo, olu esas Amoro.

### Rolaro

<b>TURANDOT</b>	Chiniana Princino	Soprano
<b>ALTOUM</b>	Chiniana Imperiestrulo	Tenoro
<b>TIMUR</b>	Tatariana Rejo destronizita	Baso
<b>KALAF</b>	Filiulo di Timur	Tenoro
<b>LIU</b>	Sklavino di Timur	Soprano
<b>PING</b>	Ministro	Baritono
<b>PANG, PONG</b>	Ministri	Tenori

Omno eventas en olima Beijing, chef-urbo di Chinia.

**AKTO I****Unesma ceno**

*Muregi di la Imperiala Urbo. La micirkla ceneyo esas cirkondata da granda bastioni. Apud portiko, sostenata da du arki, esas bronza tamtam. Sur la bastioni videblesas fosti kun la kapi di mortigiti. Plurkolora turbo china plenigas la placo, qua senmova askoltas la mandareno.*

**MANDARENO**

Habitantaro di Beijing!  
 Yen la lego:  
 Turandot, la Pura,  
 esos la spozino di ta qua,  
 kun rejala sango,  
 solvos la tri enigmati  
 quin elu savigos da lu.  
 Ma ta qua aceptos la defio  
 e fine vinkesos  
 ofros a la hakilo  
 lua superba kapo.

**TURBO**

Ho! Ho!

**MANDARENO**

La princulo di Persia  
 trovis ne fortuno ma fato:  
 ye la aparo di la luno  
 la mortigero lun senkapigos!

**TURBO**

Lu mortez! Yes, lu mortez!  
 Venez la mortigero!  
 Nemeditate! Nemeditate!  
 Lu mortez! Lu mortez!  
 A la eshafodo! Lu mortez!  
 Lu mortez!  
 Nemeditate, nemeditate lu mortez!  
 Se vu ne venas,  
 ni iros vekar vu!  
 Pu-Tin-Pao, Pu-Tin-Pao!  
 A la palaco! A la palaco!  
 A la palaco!

**JENDARMI**

Adretroe hundachi! Adretroe hundachi!

**TURBO**

Ho, kruela!...  
... Ye la cielo, haltez!

**MULIERI**

Mea matro!

**JENDARMI**

Adretroe hundachi!

**MULIERI**

Ho, mea filii!  
Kruela! Matro mea!  
Matro mea!

**VIRI**

Kruela! Ye la cielo, haltez!  
Haltez! Haltez!

**JENDARMI**

Adretroe, hundachi!

**LIU**

Mea oldo falis!

**TURBO**

Kruela! Esez humana!  
Ye la cielo, haltez! Kruela!  
Ne esez maligna a ni!

**JENDARMI**

Adretroe, hundachi!

**LIU**

Qua helpos me,  
qua helpos me sustenar lu?  
Mea oldo falis...  
Kompato! Kompato!

**KALAF**

Patro! Patro mea!

**JENDARMI**

Adretroe!

**KALAF**

Ho, patro, itere me vun renkontras!

**TURBO**

Kruela!

**KALAF**

Regardez! Lo ne esas revo!

**TURBO**

Pro quo vi frapas ni? Aye! Pieso!

**LIU**

Sioro!

**KALAF**

Patro! Askoltez me! Patro! Yen me!

Esez benedikata...

esez benedikata la chagreno  
pro ta joyo, donacita da  
ta Deo klementema!

**TIMUR**

Mea filio! Vu! Vivanta!

**KALAF**

Tacez! Ta qua usurpis la krono  
men serchas, vun persequas.  
Ne existas refujeyo por ni,  
patro, en la mondo!

**TIMUR**

Vun me serchis, mea filio,  
vua morton me supozis!

**KALAF**

Vua absenteso plorigis me, patro...  
me kisas ta santa manui.

**TIMUR**

Ho, filio, itere trovita!

**TURBO**

Yen la helpanti  
di la mortigero!  
Lu mortez! Lu mortez!

**TIMUR**

Vinkita en la batalio, me, olda rejo  
sen rejio ed exiliita,  
audis voce qua dicis a me:  
“Venez kun me, me esos vua guidero...!”  
Esis Liu.

**KALAF**

Elu benedikesez!

**TIMUR**

Me falis vinkita,  
ed elu sikigis mea lakrimi,  
mem lu mendikis por me.

**KALAF**

Liu... qua esas vu?

**LIU**

Me esas nulu... sklavino, sioro.

**TURBO**

Grindopetro turnez! Grindopetro turnez!

**KALAF**

E, pro quo vu kunsufris  
ta granda angoro?

**VIRI**

Grindopetro turnez!

**LIU**

Pro ke ye dio...

**MULIERI**

Grindopetro turnez!

**LIU**

... en la palaco vu ridetis a me.

**TURBO**

Grindopetro turnez! Turnez! Turnez!  
Turnez! Turnez! Turnez!

**HELPANTI DI LA MORTIGERO**

Akutigez la hakokultelo, olu  
falez e spricizez sango e fairo.  
Nulatempe mankas la laboro,  
nulatempe mankas...

**TURBO**

... nulatempe mankas...

**HELPANTI**

... en la rejio di Turandot.

**TURBO**

... en la rejio di Turandot.

**HELPANTI**

Akutigez! Akutigez!  
Fairo e sango!

**VIRI**

Fairo e sango!

**MULIERI**

Dolca kandidati, adavane, adavane!

**VIRI**

Ho, dolca kandidati,  
adavane, adavane!

**MULIERI**

Dolca kandidati...  
...adavane, adavane!

**HELPANTI**

Kun hoki e kun kulteli...

**VIRI**

...ni arachos vua pelo!

**TURBO**

Dolca kandidati...  
...adavane, adavane!

**HELPANTI**

...ni arachos vua pelo!

**TURBO**

Qua frapos ta tamtamo  
vidos olu aparar...

**HELPANTI, VIRI**

... vidos olu aparar.  
Tam blanka kam jado...

**OMNI**

... tam kolda kam espado  
esas la bela Turandot!

**MULIERI**

Dolca kandidati...  
...adavane, adavane!

**HELPANTI**

Adavane, adavane!

**TURBO**

Kande la tamtamo sonas  
 la mortigero ridas!  
 Vana esas la amoro sen fortuno.

**HELPANTI**

Kande la tamtamo sonas  
 la mortigero ridas!... Akutigez!

**MULIERI**

La enigmati esas tri,  
 la morto esas un!  
 La morto esas un! Akutigez!

**VIRI**

Grindopetro turnez! Akutigez!

**HELPANTI**

Kande la tamtamo sonas  
 la mortigero ridas!... Akutigez!

**TURBO**

La enigmati esas tri,  
 la morto esas un!  
 La morto esas un! Akutigez!

**HELPANTI**

Dolca kandidati...  
 ...adavane, adavane!

**MULIERI**

La enigmati esas tri,  
 la morto esas un!  
 La morto esas un! Akutigez!

**VIRI**

La hakokultilo falez,  
 spricinez sango...

**OMNI**

Qua frapos ta tamtamo?

**HELPANTI**

Akutigez! Akutigez!  
 La hakokultelo falez;  
 spricinez sango e fairo!  
 Akutigez! Akutigez!

**TURBO**

Akutigez... sango!

Sango!

**HELPANTI**

Nulatempe mankas laboro...

**TURBO**

Akutigez... sango!

**OMNI**

... en la rejio di Turandot!...

Nulatempe mankas laboro

en la rejio di Turandot!

**HELPANTI**

Morto! Morto!

Morto! Morto!

**TURBO**

Ho, ho!... Ho, ho!

**OMNI**

... en la rejio di Turandot!... Ho!

**MULIERI**

Pro quo ankore

ne aparis la luno?

**VIRI**

Pala vizajo!

**MULIERI**

Aparez en la cielo!

**VIRI**

Ja aparez!

**MULIERI**

Aparez!

**VIRI**

Kapo tranchita!

Pala! Aparez!

**MULIERI**

Aparez!

**VIRI**

Aparez en la cielo!

**MULIERI**

Kapo tranchita!  
Senforca!

**VIRI**

Senforca, pala!  
Tacema!

**MULIERI**

Malaspektanta amoranto di la mortinti!

**VIRI**

Tacema  
... aparez en la cielo!

**MULIERI**

La tombeyi...  
vartas vua lumo funerala!  
Pala, malaspektanta!

**VIRI**

Kapo tranchita!

**MULIERI**

Videz ibe, videblesas lumo!  
Venez, haste, aparez!

**VIRI**

Kapo tranchita, aparez!

**MULIERI**

Aparez!

**VIRI**

Kapo tranchita, aparez!

**MULIERI**

Aparez, pala vizajo!

**VIRI**

Pala vizajo!

**MULIERI**

Malaspektanta, pala!

**VIRI**

Venez, malaspektanta amanto di la mortinti!

**MULIERI**

Ho, amanto...

... malaspektanta di la mortinti!

### **VIRI**

Venez, venez, aparez!

### **OMNI**

Videz ibe, videblesas lumo...  
 ... qua plenigas la cielo...  
 ... kun lumo di morto!  
 Pu-Tin-Pao! La luno aparis!  
 Pu-Tin-Pao! La luno aparis!

### **PUERI**

Ibe, en la monti di la esto,  
 la cikonio kantis.  
 Ma aprilo ne florifis,  
 la nivo ne fuzesis.  
 De la dezerto a la maro, onu ne askoltas  
 mil voci qui sospiras:  
 "Princino, decendez a me!  
 Omno floreskos, omno brileskos!"  
 Ho!

*La helpanti di la mortigero, la mandereni e la eminenti avancas,  
 dop li venas la princo di Persia. Lor la aparo di la bela  
 mortigoto, pala e kun la kapo abasita, la feroceso di la  
 turbo desaparas transformata a kompato.*

### **MULIERI**

Ho, yuna! Kompato, kompato!

### **VIRI**

Quante ferme lu marchas!

### **MULIERI**

Kompato!

### **VIRI**

Quante dolca, quante dolca,  
 quante dolca esas lua vizajo!...  
 ... Joyo esas en lua okuli!  
 Kompato!

### **MULIERI**

Quante ferme lu marchas!

### **VIRI, MULIERI**

Joyo esas en lua okuli!  
 Kompato! Kompato!

**KALAF**

Ho! Kompato!

**MULIERI**

Esez kompatema!

**VIRI**

Princino!

**MULIERI**

Kompatez... ilu!

**VIRI, MULIERI**

Kompato!

**VIRI**

Princino! Indulgo! Indulgo!

Kompatez lu! Kompato!

**TURBO**

Kompato! Kompato!

**KALAF**

Me volas vidar vu,

e vun maledikar!

Krudela, me vun maledikas!

**TURBO**

Princino!

**VIRI**

Kompatez lu!

**TURBO**

Princino!

**VIRI**

Princino, kompato!

**TURBO**

Princino!

**VIRI**

Kompatez lu! Kompatez lu!

**TURBO**

Kompato! Kompato!

Ibdulgo, Princino!

Princino! Indulgo! Indulgo!

*Aparas Turandot. La turbo prosternesas. Nur la princulo di Persia, la helpanti di la mortigero e Kalaf duras esar stacanta.*

**KALAF**

Ho, deala beleso! Ho, marvelo! Ho, revo!

*Per gesto Turandot imperas mortigar la kondamnito; pose elu departas. Timur, Liu e Kalaf restas sola.*

**SACERDOTI**

Ho, granda Koung-Tze!  
La anmo di la mortonto  
irez a vu!

**TIMUR**

Filio, quon vu facas?

**KALAF**

Ka vu ne flaras olu?  
Elua odoro esas en la aero!  
Ed en la anmo!

**TIMUR**

Vu perdas la raciono!

**KALAF**

Ho, deala beleso, marvelo!  
Chagreno, patro, chagreno!

**TIMUR**

No, no! Embracez men!  
Liu, parolez a lu!  
Hike ne esas la salvo!  
Prenez ilua manuo kun ta di vu!

**LIU**

(A Kalaf)  
Sioro, ni forirez!

**TIMUR**

Ibe esas la vivo!

**KALAF**

Elu esas la vivo, patro!

**TIMUR**

Ibe esas la vivo!

**KALAF**

Chagreno, patro, chagreno!

**TIMUR**

Hike ne esas la salvo!

**KALAF**

La vivo esas hike, patro!

Turandot! Turandot!

Turandot!

**VOCO DI LA PRINCO DI PERSIA**

Turandot!

**TURBO**

Ho!

**TIMUR**

Ka vu volas mortar same?

**KALAF**

Vinkar, patro, super elua beleso!

**TIMUR**

Ka vu volas ta fino por vu?

**KALAF**

Glorioze vinkar  
super elua beleso!

*Lu kuras a la tamtamo. Ping, Pong e Pang, funcioneri di la imperiestro, interpozas su inter lu e la tamtamo.*

**PING, PONG, PANG**

Haltez! Quon vu facas? Haltez!

Qua esas vu? Quon vu facas?

Quon vu volas? Forirez!

Forirez! Olta esas la pordo

di la granda mortigeyo!

Folo, forirez!

**PING**

Hike onu strangulas!

**PONG, PANG**

Onu espadomortigas!

**PING**

Onu kolosekas!

**PONG, PANG**

Onu kapotranchas!

**PING**

Onu pendigas e senkapigas!

**PONG, PANG**

Forirez!

**PING**

Onu segas ed ekvicerizas!

**PONG, PANG**

Forirez!

**PING**

Nemediane, departez...

**PONG, PANG**

Forirez!

**PING, PONG, PANG**

... retroirez a vua lando...

**PING**

... ibe serchez muro...

**PONG, PANG**

Quon vu volas? Qua esas vu?

**PING**

... e ruptez vua korni kontre olu!

**PONG, PANG**

Forirez! Forirez!

**PING, PONG, PANG**

Ma vu ne restez hike!

Folo, forirez! Forirez!

**KALAF**

Lasez a me pasar!

**PONG**

Hike omna tombeyi  
esas plena!

**PANG**

Suficanta foli esas en ta lando!

**PING**

Ni ne volas plusa foli exterlandana!

**PONG, PANG**

Forirez, o preparez  
vua enterigo!

**KALAF**

Lasez a me pasar!

**PONG, PANG**

Por princino!

**PONG**

Fi!

**PANG**

Fi!

**PONG**

Quo esas?

**PANG**

Ka muliero kun krono  
sur la kapo...

**PONG**

... e mantelo franjizita?

**PING**

Ma se vu desmetas elua vesti...

**PONG**

... elu nur esas karno!

**PANG**

Kruda karno!

**PING**

Elu esas ulo...

**PING, PONG, PANG**

... qua ne esas manjebla!

**KALAF**

Lasez a me pasar...

**PING, PONG, PANG**

Ho, ho, ho! Ho, ho, ho!

**KALAF**

... lasez!

**PING**

Lasez la mulieri!  
 O spozinigez cent,  
 nam, advere, la maxim sublima  
 Turandot di la mondo  
 havas vizajo, du brakii,  
 e du gambi, yes,  
 belega, imperiala, yes, yes,  
 belega, yes,  
 ma sempre egala.  
 Kun cent mulieri, stulto,  
 vu havos tre multa gambi,  
 duacent brakii,  
 e cent dolca pektori!

**PONG, PANG**

Cent pektori...

**PING**

... repartisita ye cent liti...

**PING, PONG, PANG**

... ye cent liti.  
 Ho, ho, ho! Ho, ho, ho!

**KALAF**

Lasez a me pasar!

**PING, PONG, PANG**

Folo, forirez, forirez!

**SERVISTINI DI TURANDOT**

He! Silenco!  
 Qua parolas infre?

**UNESMA SERVISTINO**

Silenco!

**DUESMA SERVISTINO**

Silenco!

**LA DU SERVISTINI**

Esas la dolcega kloko por...  
 ... dormar!

**ALTRA SERVISTINI**

Silenco, silenco, silenco!

**UNESMA SERVISTINO**

La somnoleso...

karecas...

**ALTRA SERVISTINI**

La somnoleso karecas...

**DUESMA SERVISTINO**

...karecas la okuli...

**ALTRA SERVISTINI**

...di Turandot.

**LA DU SERVISTINI**

La obskureso parfumizesas de elu!

**ALTRA SERVISTINI**

La obskureso parfumizesas de elu!

**PING**

Forirez, mulieri babilachema!

**PANG**

Forirez!

**PONG**

Forirez!

**PING**

Forirez!

**PING, PONG, PANG**

Atencez la tamtamo!

Atencez la tamtamo!

**KALAF**

La obskureso parfumizesas de elu!

**PANG**

Regardez lu, Pong!

**PONG**

Regardez lu, Ping!

**PING**

Regardez lu, Pang!

**PANG**

Lu esas surda!

**PONG**

Stulta!

**PING**

Stupida!

**TIMUR**

Lu ne plus askoltas vi!

**PING, PONG, PANG**

Nu! Ni tri parolez a lu!

**PANG**

Nokto sen mem mem mikra lumo...

**PONG**

... nigra internajo di kamen...

**PING**... esas plu klara kam la enigmati  
di Turandot.**PANG**

Fero, bronzo, muro, roko...

**PONG**

... vua obstinata kapo...

**PING**... esas min harda kam la enigmati  
di Turandot!**PANG**

Irez, do, adiez omni!

**PONG**

Transirez montaro, trairez la mar-ondi!

**PING**Esez maxim fore de la enigmati  
di Turandot! Ho! Ho!**PANG**

He, he!

**PONG**

Ho, ho!

**PING, PONG, PANG**

Ho, ho!

*Aparas e desaparas la fantomi di ti quin mortigis Turandot.*

**FANTOMI**

Ne plus dubez!  
 Se vu elun advokas, elu aparos,  
 elta qua, mem mortinti,  
 igas ni havar elu en nia revi!  
 Vu paroligez elu!  
 Ni volas askoltar elu!  
 Ni amoras lu! Ni amoras lu!

**KALAF**

No, no, nur me amoras lu!

**PING, PONG, PANG**

Ka vu amoras lu? Quo? Quan?  
 Ka Turandot? Ho, ho, ho!  
 Turandot! Ho, ho!

**PONG**

Dementa yunulo!

**PANG**

Turandot ne existas!

**PING**

Nur existas nulon,  
 e la nuleso nuligas vu!

**PONG, PANG**

Turandot ne existas, ne existas...

**PING**

Turandot! Same kam ta stulti,  
 tam stulti kam vu!  
 La homo! La Deo!  
 Me! La populi!...  
 ... La suvereni!...  
 Pu-Tin-Pao!...

**PANG**

Vu nuligas vu same kam ta stulti  
 qui esis quale vu...

**PONG**

... quale omni...

**PING**

... Pu-Tin-Pao!  
 Nur existas la Tao!

**PANG**

... vu nuligas vu same kam ta stulti  
qui esis quale vu...

**PONG**

... same kam ta stulti;  
nur existas...  
... la Tao!

**KALAF**

Venez a me la vinko!  
Venez a me la amoro!

*Sur la bastiono aparas la mortigero kun la tranchita kapo  
di la princo di Persia.*

**PING, PONG, PANG**

Stulta! Yen olu, la amoro!  
Same la luno kisos vua vizajo!

**TIMUR**

Ho, filio,  
ka vu volas ke me sola,  
sola, parkurez la mondo kun  
mea oldeso chagrenoza?  
Helpez me! Ka ne existas homa voco  
kapabla emocigar vua harda kordio?

**LIU**

Sioro, askoltez!  
Ho! Sioro, askoltez!  
Liu ne plus havas forci,  
lua kordio ruptesas!  
Aye, aye, sempre me marchas  
kun vua nomo en mea anmo,  
kun vua nomo en la labii!  
Ma se vua destino,  
morge decidesas,  
lore ni mortos  
sur la voyo a la exilo.  
Lu perdos lua filio...  
me, la memoro di rideto.  
Liu ne plus existas!  
Ho, kompato!

**KALAF**

Ne plus plorez, Liu!  
Se ye fora dio  
me ridetis a vu,  
ye ta rideto,

dolca yunino mea,  
askoltez: vua mastro, morge,  
forsan esos sola en la mondo.  
Ne abandonez lu,  
departez kune!

**LIU**

Ni mortos sur la voyo a la exilo!

**TIMUR**

Ni mortos!

**KALAF**

Dolcigez a lu la voyo  
a la exilo!  
Ton... ton, mea kara Liu,  
me pregas a vua mikra kordio,  
qua ne perdas lua forteso,  
ton pregas ta qua ne plus ridas.

**TIMUR**

Ho! Ye la lasta foyo!...

**LIU**

Vinkez ta maligna facino!

**PING, PONG, PANG**

La vivo esas tante bela!

**TIMUR**

... esez kompatema a me!

**LIU**

Esez kompatema a Liu!

**PING, PONG, PANG**

La vivo esas tante bela!

**TIMUR**

Esez kompatema a me, a...  
kompato, kompato!

**LIU**

Sioro, kompato!  
Esez kompatema a Liu!

**PING, PONG, PANG**

Ne irez a vua fino!

**KALAF**

Me pregas kompato a me!  
Me ne plus askoltas vi...

**LIU**

Sioro, kompato!  
Kompato a Liu!

**TIMUR**

Me ne povas vivar sen vu!

**PING**

Sizez lu...

**PING, PONG, PANG**

... departiguez lun!

**KALAF**

... Me ne plus askoltas vi...

**PING**

Haltez ta furioza folo...  
... departiguez lun!

**PONG, PANG**

Departiguez ta furioza folo!

**LIU**

Kompato!

**KALAF**

Me vidas elua lumoza vizajo!  
Olun me vidas!

**TIMUR**

Me ne volas separar me de vu!  
Kompato!

**PING, PONG, PANG**

Departiguez ta furioza folo!

**KALAF**

Elu advokas me! Esas elu!

**TIMUR**

Kompato!  
Ye vua pedi me suplikas e ploras!

**PING, PONG, PANG**

Haltez ta furioza folo!

**LIU**  
Kompato!

**KALAF**  
Suplikas vua pardono...

**LIU**  
Sioro, kompato, kompato!

**TIMUR**  
Kompato, kompato!

**PING, PONG, PANG**  
Vu foleskas! Vu foleskas!

**KALAF**  
... ta qua ne plus ridas!

**LIU**  
Kompato, sioro!

**TIMUR**  
Ne volez mea morto!

**PING, PONG, PANG**  
La vivo esas belega!

**PING**  
Nu, ni esforcez lastafoye,  
departiguez lu!

**PING, PONG, PANG**  
Ni departiguez lu! Ni departiguez lu!

**KALAF**  
Lasez me...  
... me sufris tro multe!

**TIMUR**  
Vu pedopresas mea kordio...

**PING, PONG, PANG**  
La vizajo quan vu vidas esas nur iluziono!

**KALAF**  
La glorio vartas me ibe!

**TIMUR**  
... qua vane sangifas por vu.

**PING, PONG, PANG**

Ta lumo brilanta esas funesta!

**KALAF**

Ne existas homa forco  
kapabla haltar me!

**LIU**

Kompato!

**TIMUR**

Nulatempe ulu vinkis, nulatempe!

**PING**

Vu riskas perdar la vivo!

**PONG, PANG**

Nur esas funesta iluziono!

**KALAF**

Me aceptas mea destino!

**LIU**

Esez kompatema a ni!

**TIMUR**

Adsur ni omna falis la espado!

**PING, PONG, PANG**

Vu riskas perdar vua kapo!

**KALAF**

Me esas desquieteso,  
me esas foleso!

**LIU**

Se la tormento ne suficas,  
sioro..

**PING, PONG, PANG**

La morto, la ombro di la mortigero...

**TURBO**

Ni ja exkavas tombo por vu...

**KALAF**

Singla senso esas enorma torturo!

**LIU**

... la fino esas proxima! Kun vu!

**PING, PONG, PANG**

La morto, la ombro di la mortigero  
esas vartanta!

**TURBO**

... qua volas defiar la amoro!

**LIU**

Aye! Ni forirez...

**TIMUR**

Me suplikas ye vua pedi!

**PING, PONG, PANG**

Vu kuras...

**TURBO**

En la obskureso...

**KALAF**

En singla parto di mea anmo  
esas voxo qua klamas...

**LIU**

... sioro, aye, ni departez!

**TIMUR**

Ne volez mea morto!

**PING, PONG, PANG**

... a vua fino!  
Vu ne riskez vua vivo!

**TURBO**

... ja esas grabita,  
aye! vua kruela fato!

**KALAF**

... Turandot!

**LIU, TIMUR, PING, PONG, PANG**

La morto!

**TURBO**

Ho!

**KALAF**

Turandot!

**LIU, TIMUR, PING, PONG PANG**  
La morto!

**TURBO**  
Ho!

**KALAF**  
Turandot!

**LIU, TIMUR, PING, PONG PANG**  
La morto!

**TURBO**  
Ho!

*Kalaf frapas la tamtamo trifoye*

**PING, PONG, PANG**  
Ni lasez lu...  
Esas neutila klamar...

**TURBO**  
Ni ja exkavas tombo por vu...

**PING, PONG, PANG**  
... en la sanskrita, en la china,  
en la linguo di Mongolia!  
Kande la tamtamo sonas  
la morto ridegas!

**TURBO**  
... qua volas defiar la amoro!

**PING, PONG, PANG**  
Ho, ho, ho, ho!

## AKTO II

### Unesma ceno

**PING**  
Saluto, Pang! Saluto, Pong!  
Pro ke la funesta tamtamo  
vekas la palaco e la urbo,  
ni esez pronta por irga eventajo:  
se la exterlandano vinkas,  
por la mariajo,  
ma se lu vinkesas,  
por la enterigo.

**PONG**

Me aranjos la mariajo...

**PANG**

... e me la enterigo...

**PONG**

... la reda lampi festala...

**PANG**

... la blanka lampi traurala...

**PONG**

... la incensi, la ofri...

**PANG**

... la incensi, la ofri...

**PONG**

... papera pekunio, metala...

**PANG**

... teo, sukro, muskado...

**PONG**

... la bela palankino reda...

**PANG**

... la granda sarko, bonfacita...

**PONG**

... la bonzi qui kantas...

**PANG**

... la bonzi qui jemas...

**PONG, PANG**

... ed omno cetera,  
segun imperas la rituo...

**PANG**

... preciza...

**PONG**

... detaloza...

**PONG, PANG**

... infinita!

**PING**

Ho, Chinia, ho Chinia,  
hodie altereskanta,  
hodie deskieteskanta,  
felice vu dormis  
kun fiereso pro vua  
existeo dum mili de yarmili!

**PING, PONG, PANG**

Omno bone funcionis segun  
la anciena legi di la mondo.

**PANG**

Pose naskis...

**PONG**

Poose naskis...

**PING**

Pose naskis...

**PING, PONG, PANG**

... Turandot!

**PING**

E dum la lasta yari nia festi  
ne esas altro diferanta kam to...

**PONG**

... tri frapi ye la tamtamo...

**PANG**

... tri enigmati...

**PING**

... e senkapigo!

**PONG**

Senkapigo!

**PING**

Senkapigo!

**PANG**

Dum la yaro di la Muso mortis sis.

**PONG**

Dum la yaro di la Hundo mortis ok.

**PANG**

Ma dum ta yaro,  
la teroriganta...

**PING**

Ma dum ta yaro,  
la teroriganta yaro di la Tigro...

**PONG**

... la teroriganta yaro di la Tigro,  
ja mortigesis...

**PANG**

... yaro di la Tigro,  
ja mortigesis...

**PING**

... ja mortigesis...

**PONG, PANG**

... ja mortigesis...

**PING**

dek e tri...

**PONG, PANG**

... dek e tri,  
se onu inkluzas ilta!

**PING**

Quante multa laboro!

**PANG**

Tre multa laboro!

**PONG**

Tre multa tedeso!

**PING**

Tre multa laboro!

**PANG**

Tre multa laboro!

**PONG**

Tre multa tedeso!

**PING, PONG, PANG**

Ma quo ni esas nunatempe?  
Ni esas la ministri di la mortigero!

Ministri di la mortigero!

**PING**

Me havas domo en Honan,  
kun olua lageto blua  
cirkondita de bambui.  
E me esas hike,  
disipante mea vivo,  
laborigante mea cerebro  
super la sakra libri...

**PONG, PANG**

... super la sakra libri!

**PING**

... super la sakra libri!  
E me povus retroirar adibe...

**PANG**

Retroirar adibe!

**PONG**

Retroirar adibe!

**PING**

... apud mea lageto blua...

**PANG**

Retroirar adibe!

**PONG**

Retroirar adibe!

**PING**

... cirkondita de bambui!

**PONG**

Me havas bosketo, proxim Tsiang...  
... ne existas altra bosko plu bela...

**PANG**

Me havas gardeno, proxim Kiu,  
quan me abandonis...

**PONG**

... ube ne esas ombro por me.

**PANG**

... por venar adhike...

**PING**

Me povus retroirar adibe...

**PONG**

Me havas bosko...

**PANG**

... e ne plus me vidos olu...

**PING**

... apud mea lageto blua!...

**PONG**

... ne existas altra bosko plu bela!

**PANG**

... e ne plus me vidos olu, ne plus!

**PING**

Cirkondita de bambui!

Ma ni esas hike...

**PONG**

Ni esas hike!

**PANG**

Ni esas hike!

**PING**

... laborigante la cerebro...

**PING, PONG, PANG**

... super la sakra libri!

**PONG**

Me povus retroirar a a Tsiang...

**PING**

Me povus retroirar adibe...

**PANG**

Me povus retroirar a Kiu!

**PING**

... e juar la lageto blua!

**PONG**

Tsiang!

**PANG**  
Kiu!

**PING**  
Honan...  
... cirkondita de bambui!

**PONG**  
Me povus retroirar a Tsiang!

**PANG**  
Me povus retroirar a Kiu!

**PING**  
Ho, mondo...

**PONG**  
Ho mondo...

**PANG**  
Ho mondo...

**PING, PONG, PANG**  
... plena de fola amoranti!

**PONG**  
Tre multa...

**PANG**  
Tre multa...

**PONG, PANG**  
Tre multa kandidati  
ni vidis arivar hike!

**PING**  
Ho, tre multa!

**PONG**  
Ho, tre multa!

**PING**  
Tre multa kandidati  
ni vidis arivar hike!

**PANG**  
Ho, tre multa, tre multa!

**PONG**  
Ho, tre multa!

**PING**

Ho, mondo, plena  
de fola amoranti!  
Ka vi memoran la princulo  
rejala di Samarkanda?  
Lu demandis mariajo,  
ma elu, kun granda joyo  
irigis lu a la mortigero!

**TURBO**

Akutigez! Akutigez!  
La hakokultelo falez;  
spricinez...

**PING**

La mortigero!

**TURBO**

... la hakokultelo falez,  
spricinez...  
... fairo e sango!

**PONG**

E la iritita indiano Sagarika,  
... kun enorma orel-ringi?  
Lu demandis amoro ma senkapigesis!

**PANG**

E la Burmano?

**PONG**

E la princulo di la Kirgisani?

**PONG, PANG**

Mortinti! Mortinti! Mortinti! Mortinti!

**PING**

E la Tatariano di qua arko  
esis longa ye sis kudi...

**TURBO**

Akutigez! Akutigez!  
...la hakokultelo spricinez sango...

**PING**

... luxoze ornita?

**TURBO**

En la rejio di Turandot...

la laboro...

**PONG**

Extingita!

**PANG**

Extingita!

**TURBO**

... nulate tempe mankas!

**PING**

E senkapigas!

**PANG**

Mortigas... extingas! Mortigas!

Extingas! Mortigas!

**PING**

Mortigas! Mortigas! Mortigas! Mortigas!

**PONG**

Mortigas! Mortigas! Mortigas!

**TURBO**

Akutigez! Akutigez!

La hakokultelo spricigez sango!

**PING, PONG, PANG**

Adio, amoro, adio, raso!

Adio, dea raso!

Adio!

Chinia finesas!

Adio!

**PING**

Ho, tigro! Ho, tigro!

**PING, PONG**

Ho, granda marshalo di la cielo...

**PING, PONG, PANG**

... igez venar

la granda nokto vartata,

la nokto di la pardono!

**PING**

Me volas aranjar elua lito!

**PONG**

Me sponjizar por elu la dolca plumi.

**PANG**

Me volas parfumizar elua chambro.

**PING**

Me guidos la gespozi per lanterno.

**PING, PONG, PANG**

Pose ni tri en la gardeno kantos...

**PONG**

... a la amoro til la jornesko...

**PING**

... tale:

**PANG**

... tale:

**PING, PONG, PANG**

Ne esas en Chinia,  
e lo esas fortuno,  
ula muliero  
qua desprizas la amoro!  
Esis unika muliero ek glacio,  
ma nun elu esas flamo ardoranta!  
Princino,  
vua imperio extensesas  
de la Tse-Kiang a la grandega Yang-Tse!

**PING**

Ma dop la dolca kurteni,  
esas spozulo qua imperas a vu!

**PING, PONG, PANG**

Vu ja sentas la varmeso di la kisi,  
vu ja domtesis, vinkesis!

**PONG, PANG**

Glorio por la sekreta nokto  
qua esas testo de la miraklo!

**PING, PANG**

Glorio, glorio por la sekreta nokto!

**PONG**

A la flava litkovrilo silka...  
... testo di la dolca sospiri!

**PING, PONG, PANG**

En la gardeni la kozi susuras  
 e tinklas same kam  
 sonalii ek oro...  
 Onu sospiras amoroza vorti...

**PING**

... la flori ornesas da la roso!

**PING, PONG, PANG**

Glorio, glorio  
 por la bela korpo sen la zono  
 qua hodie konocas la ignorata misterio!  
 Glorio a la deliro  
 ed a la amoro vinkanta  
 qua rivenigis la paco a Chinia,  
 a Chinia rivenigis la paco,  
 rivenigis la paco!

**PING**

Ni revas, ni revas,  
 ed en la palaco omno movesas,  
 la lanterni, la servisti e la soldati!  
 Askoltez la granda tamburo  
 di la Verda Templo!  
 Audeblesas la sono di la nombroza  
 pantofli di Beijing!

**PONG**

Askoltez la trumpeti!  
 Nula paco!

**PANG**

Komencas la ceremonio.

**PING, PONG. PANG**

Ni juez la n-esma,  
 la n-esma mortigo!

**Duesma Ceno**

*Granda placo di la palaco imperiala. La mandareni arivas, pasas ok savozi. Singlu kunportas tri pergamina folii qui havas la solvo di la enigmati di Turandot.*

**TURBO**

Grave, maxim serioze,

kun la misterio  
di la nesolvita enigmati,  
avancas la savozi,  
kun la misterio  
di la nesolvita enigmati,  
avancas la savozi.  
Hike esas Ping! Hike esas Pong!  
Hike esas Pang!

*Inter nubi di incenso aparas la flava e blanka flagi di la imperiestro. Kande la fumuro disipesas, videblesas la imperiestro Altoum, evozega, blanka, veneracinda e hieratika. Lu havas la sama aspekto kam deo aparanta inter nubaro. La turbo maxim profunde reverencias a lu. Kalaf esas apud la perono.*

**TURBO**

Dekamil yari vivez  
nia Imperiestro!  
Glorio por vu!

**IMPERIESTRO**

Maxim kruela juro imperas  
ke me satisfacez trista pakto.  
E la sakra ceptro quan me prenas  
esas sango-makulizita.  
Ne plusa sango! Yunulo, forirez!

**KALAF**

Filiulo di la cielo, me solicitas  
solvar la enigmati!

**IMPERIESTRO**

Permizez ke me povos vivar sen remorso  
pro la fino di vua yuna vivo!

**KALAF**

Filiulo di la cielo, me solicitas  
solvar la enigmati!

**IMPERIESTRO**

Vu ne volez ke hororigesez  
itere la korto, la mondo!

**KALAF**

Filiulo di la cielo, me solicitas  
solvar la enigmati!

**IMPERIESTRO**

Exterlandano ebriigita da morto! Tale esez!  
Venez vua destino!

**TURBO**

Dekamil yari vivez  
nia Imperiestro!

**MANDARENO**

Habitantaro di Beijing!  
Yen la lego:  
Turandot, la Pura,  
esos la spozino di ta qua,  
kun rejala sango,  
solvos la tri enigmati  
quin elu savigos da lu.  
Ma ta qua aceptos la defio  
e fine vinkesos  
ofros a la hakilo  
lua superba kapo.

**PUERI**

De la dezerto a la maro vu ne askoltas  
la sospiri di mil voci.  
Princino, venez apud me!  
Omno brileskos,  
brileskos, brileskos!

**TURANDOT**

En ta korto,  
ye yarmili ante nun,  
audesis klamo senespera.  
E ta klamo,  
de generaciono a generaciono  
refujesis hike en mea anmo!  
Princino Lo-u-Ling,  
dolca e serena avino qua regnis  
en obskura silenco,  
en pura joyo,  
e defiis neflexible e sekure  
la destranquila domeno,  
hodie rivivas en me!

**TURBO**

Kande la rejo di la Tatariani  
desfaldis lua sep flagi.

**TURANDOT**

Ma ye ta epoko,  
quan omni memoras,

la teroro e la armi regnis.  
 La rejo vivkesis! La rejo vinkesis!  
 E Lo-u-Ling, mea avino,  
 atraktesis da viro simila a vu,  
 da exterlandana viro simila a vu,  
 ye ta kruela nokto,  
 kande elua fresha voco extingesis!

**TURBO**

Dum yarcenti elu dormas  
 en lua enorma mausoleo.

**TURANDOT**

Ho, princuli,  
 qui en longa karavani  
 venas de omna loki di la mondo  
 adhike por pariar via fortuni,  
 me venjas en vi, en vi omna,  
 olta pureso,  
 olta klamo ed olta morta!  
 Olta klamo ed olta morta!  
 Nulatempe viro proprietos me!  
 Nulatempe! Nulu! Nulu proprietos me!  
 La hororo qua mortigis elu  
 duras vivar en mea kordio!  
 No! No! Nulu proprietos me, nulu!  
 Ho, rinaskas en me la fiereso  
 di tante multa pureso!  
 Exterlandano!  
 Ne riskez vua destino!  
 La enigmati esas tri,  
 un esas la morto!

**KALAF**

No! No!  
 La enigmati esas tri,  
 un esas la vivo!

**TURANDOT**

No! No!  
 La enigmati esas tri,  
 un esas la morto!

**KALAF**

La enigmati esas tri,  
 un esas la vivo!

**TURBO**

A la exterlandana princulo  
 questionas Turandot,

ho, Turandot! Turandot!

### **TURANDOT**

Exterlandano, askoltez:  
 "En la nokto ombroza  
 flugas brilanta fantomo.  
 Lu elevas su ed extensas lua ali  
 sur la nigra ed infinita homaro.  
 Omna personi advokas lu  
 ed omna personi imploras lu,  
 ma la fantomo desaparas  
 lor la auroro  
 por rinaskar en la kordio.  
 E ye singla nokto naskas,  
 e ye singla jorno mortas!"

### **KALAF**

Yes! Rinaskas! Rinaskas!  
 E kun exalto lu igas  
 me irar kun lu;  
 Turandot: "la espero!"

### **SAVOZI**

(*Li lektas la unesma folio*)  
 La espero! La espero!  
 La espero!

### **TURANDOT**

Yes!  
 La espero  
 qua sempre deceptas ni!  
 (*Lu lektas la duesma folio*)  
 "Brilas same kam flamo  
 ma ne esas flamo!  
 Forsan olu esas deliro.  
 Impetuoza ed ardoranta!  
 ma povas langoreskar!  
 Se perdo o morto olu koldeskas.  
 Se onu revas pri konquesto,  
 lore olu inflameskas, inflameskas!  
 Olu havas voco palpitanta  
 quan vu askoltas dum  
 la brilanta sunokusho!"

### **IMPERIESTRO**

Ne erorez, exterlandano!

### **TURBO**

Vu riskas perdar la vivo! Parolez!  
 Ne erorez, exterlandano! Parolez!

**Parolez! Parolez! Parolez!**

**LIU**

Vu povas perdar o ganar la amoro!

**KALAF**

Yes, princino!  
 Olu inflameskas e langoreskas,  
 se vu regardas me, en la veini:  
 "la sango!"

**SAVOZI**

La sango! La sango! La sango!

**TURBO**

Kurajo, solvero de enigmati!

**TURANDOT**

Bastonofrapez ta infami!  
*(Lu lektas la triesma folio)*  
 "Glacio qua vun inflamas  
 e kun vua fairo lu pluse glacieskas!  
 Blanka ed obskura!  
 Se lu volas liberigar vu,  
 lore plu multe sklavigas vu.  
 Se lu aceptas vu kom sklavo,  
 lore kronizas vu kom Rejo!"  
 Adavane, exterlandano,  
 la pavoro igas vu paleskar!  
 Vu ja aceptas la desvinko!  
 Adavane, exterlandano,  
 glacio qua donas fairo, quo esas to?

**KALAF**

Nun mea vinko  
 igas vu esar mea!  
 Mea fairo fuzas vua glacio:  
 "Turandot!"

**SAVOZI**

Turandot! Turandot! Turandot!

**TURBO**

Turandot! Turandot!  
 Glorio, glorio, vinkanto!  
 Ridetas a vu la vivo!  
 Ridetas a vu la amoro!  
 Dekamil yari vivez  
 nia Imperiestro!  
 Lumo, lumo, rejo di la tota mondo!

**TURANDOT**

Filio di la cielo! Patro augusta!  
 No! Ne pulsez vua filiino  
 a la brakii di la exterlandano!

**IMPERIESTRO**

La juro esas sakra!

**TURANDOT**

No, ne dicez to!  
 Sakra esas vua filiino!  
 Vu ne povas donar me a lu,  
 a lu, quale se me esus sklavo.  
 No, no! Sakra esas vua filiino!  
 Vu ne povas donar me a lu,  
 a lu, quale se me esus sklavo,  
 qua mortigesos da la shamo.

(A Kalaf)

Ne regardez me tale!  
 Vu, ofensero por me,  
 ne regardez me tale!  
 Me ne esos vua!  
 No, me ne esos vua!  
 Lon me ne volas, no, no!  
 No, no, me ne esos vua!

**IMPERIESTRO**

La juro esas sakra!

**TURBO**

La juro esas sakra!

**TURANDOT**

Ne regardez a me tale!  
 Me ne esos vua!

**TURBO**

Ilu vinkis, princino!  
 Lu riskis perdar la vivo por vu!

**TURANDOT**

Nulu esos mea mastro!

**TURBO**

Rekompensez ilua audaco!  
 Lu riskis perdar la vivo por vu!  
 La juro esas sakra!

**TURANDOT**

(A Kalaf)

Ka vu volas ke me oblige esez  
 inter vua brakii, tote iracigita?

**TURBO**

Sakra, esas sakra,  
 la juro esas sakra, esas sakra!

**KALAF**

No, no, superba princino.  
 Me volas vua ardoranta amoro!

**TURBO**

Brava! Audacoza!  
 Brava! Forta!

**KALAF**

Tri enigmati propozesis a me  
 e tri enigmatin me solvis.  
 A vu me propozas nur un:  
 vu ne konocas mea nomo.  
 Dicez a me mea nomo.  
 Dicez a me mea nomo  
 ante la jornesko,  
 e ye la auroro me mortos!

**IMPERIESTRO**

Volez la cielo  
 ke ye la jornesko  
 vu esez filio mea!

*La kortani staceskas e departeskas. Ondifas la flagi. La princulo acensas la perono, dume audesas la himno imperiala kantata da la turbo.*

**TURBO**

Ye vua pedi ni suplikas,  
 Lumo, Rejo di la tota Mondo!  
 Pro vua savozeso, pro vua benigneso,  
 ni donas nia vivi a vu,  
 kun feliceso e humileso,  
 acendez nia amo a vu!  
 Dekamil yari vivez  
 nia Imperiestro!  
 A vu, sucedanto di Hien-Wang,  
 ni klamas:  
 Dekamil yari vivez  
 nia Imperiestro!  
 Adsupre, ondifez la flagi!

Glorio por vu,  
glorio por vu!

*Gardeno di la palaco. Nokte. Kalaf askolta fora voci di la heraldi qui dissavigas la imperi rejala.*

## AKTO III

### Unesma ceno

#### **HERALDI**

Ton imperas Turandot:  
"Nulu dormez en Beijing  
dum ta nokto!"

#### **VOCES LEJANAS**

Nulu dormez!  
Nulu dormez!

#### **HERALDI**

"Ye minaco de morto-puniso,  
la nomo di la nekonocato  
devas esar revelata  
ante la jornesko!"

#### **FORA VOCI**

Morto-puniso! Morto-puniso!

#### **HERALDI**

"Nulu dormez en Beijing  
dum ta nokto!"

#### **FORA VOCI**

Nulu dormez!  
Nulu dormez!

#### **KALAF**

Nulu dormez!  
Nulu dormez!  
Anke ne vu, ho, princino,  
en vua kolda chambro  
regardas la steli  
qui tremas pro amoro ed espero!  
Ma mea misterio  
esas gardita en me,  
mea nomon nulu savos!  
No, no, apud vua boko me dicos olu,  
kande la lumo brilos!  
E kiso da me ruptos la silenco

qua igas vu esar mea.

**VOCI DI MULIERI**

Ilua nomon nulu savos...  
e ni devas, aye, mortar, mortar!

**KALAF**

Desaparez, ho nokto!  
Sukushez steli!  
Sukushez steli!  
Ye la auroro me vinkos!  
Me vinkos! Me vinkos!

**PING**

Vu, qua spektas la steli,  
abazez la okuli,  
abazez la okuli!

**PONG**

Nia vivo esas en vua manui!

**PANG**

Nia vivo!

**PING**

Ka vu askoltis la impero?  
Ye la stradi di Beijing,  
la morto frapas omna pordi  
e klamas: Ilua nomo!

**PONG**

Ilua nomo!

**PONG, PANG**

Ilua nomo!

**PING, PONG, PANG**

Ho, sango!

**KALAF**

Quon vi volas de me?

**PING**

Vu dicez quon vu volas!  
Vu dicez quon vu volas!

**PONG**

Vu dicez quon vu volas!

**PING**

Kad esas amoro to quon vu serchas?

**PANG**

Vu dicez quon vu volas!

**PING**

Vu dicez quon vu volas!

Nu, yen to por vu!

*Lu pulsas grupo de belega yunini preske nuda  
a la pedi di la princulo.*

Videz, eli esas bela,  
bela yunini inter blanka veli!

**PONG, PANG**

Korpi sensuala...

**PING**

Li esas la auguro  
de senfina embraci!

**MULIERI**

Aye! Aye! Aye! Aye!  
Aye! Aye! Aye! Aye!

**KALAF**

No! No!

**PONG, PANG**

Quon vu volas?

**PING, PONG, PANG**

Richeso?

Ta omna trezori esos vua!

Vua!... Vua!... Vua!

*Lor gesto da li, plura servisti depozas ye la pedi di la  
princulo saki, buxi e korbi plenigita de oro e juveli.*

*La tri ministri montras ta brilanta trezori  
a la surprizata okuli di la princulo.*

**PING**

Ruptas la nigra nokton...

**PONG**

Blua fairi!

**PING**

... ta brilantega gemi!

**PANG**

Verda lumoradii!

**PONG**

Belega hiacinti!

**PANG**

Reda flami di la rubini!

**PING**

Oli esas guti di astri!

**PONG, PANG**

Blua fairi!

**PING**

Por vu! To omno esas vua!

**PONG, PANG**

Reda flami!

**KALAF**

No! Me ne volas richaji! No!

**PING, PONG, PANG**

Ka vu volas la glorio?

Ni helpos vu fugar...

**PONG, PANG**

... e vu iros fore kun la steli  
ad extraordinara imperii!

**TURBO**

Fugez! Fugez!

**MULIERI**

Forirez! Forirez!

**OMNI**

Fugez, forirez! Forirez!

**VIRI**

Forirez!

**OMNI**

Fugez! Fugez! Forirez  
e lo salvos ni omna!

**KALAF**

Jornesko, venez!  
Desaparigez ta mala revo!

**PING**

Exterlandano, vu ne savas, vu ne savas  
quon la kruelino esas kapabla facar.

**PING, PONG, PANG**

Vu ne savas...

**PONG, PANG**

... quante hororoza tormenti...

**PING**

Vu ne savas! Vu ne savas!

**PONG, PANG**

... inventesis en Chinia.  
Se vu ne departas e ne revelas a ni...

**PONG, PANG, TURBO**

... vua nomo, lore omno perdesos...

**PING**

Elu nek dormas nek pardonas!  
Omno esas perdita!  
La tormento esos hororoza!

**PING, PANG, PONG, VIRI**

Fera pikili!  
Dornoza roti!

**TURBO**

La tormento esos hororoza!

**PING, VIRI**

La ardoranta mordo  
da la tenalio!

**PONG, PANG**

Lenta morto pazope!

**PING, TURBO**

Lenta morto pazope!

**PONG, PANG**

Ne igez ni mortar!

**OMNI**

Ne igez ni mortar, no,  
ne igez ni mortar!

**KALAF**

Neutila supliki!  
Neutila minaci!  
Mem se la mondo destruktesas,  
me duras amorar Turandot!

**TURBO**

Elu ne esos vua! Ho, elu ne esos vua!  
Vua morto venos ante olta nia!  
Maledikita!  
Vu mortos ante ke ni mortos,  
kruela, kruela!  
Parolez, la nomo, la nomo!  
Parolez, parolez, parolez!  
La nomo, la nomo!

**SOLDATI**

Yen hike la nomo!  
Yen olu hike! Yen olu hike!  
Yen hike la nomo!  
Yen olu hike! Yen olu hike!

**KALAF**

Li ne savas la nomo!  
Li ne savas mea nomo!

**PING**

Li esas la oldulo e la yunino  
qui hiere nokte parolis kun vu!

**KALAF**

Liberigez lin!

**PING**

Li konocas la sekretajo!  
(A la soldati)  
Ube vi kaptis li?

**SOLDATI**

Dum ke li vagis ibe,  
apud la murego!

**PING, PONG, PANG**

Princino!

**OMNI**

Princino!

**PING**

Dea princino! La nomo  
di la nekonocato esas celita  
en ta silencoza boki.  
Ma ni havas apta feraji  
por desklozar ta dentari,  
e suficanta hoki  
por arachar ta nomo!

**TURANDOT**

Vu esas pala, exterlandano!

**KALAF**

Vua timo  
vidas la paleso di la jornesko  
en mea vizajo.  
Li ne konocas me!

**TURANDOT**

Forsan, forsan!  
He, oldo, oldo! Parolez!  
Lu parolez, lu parolez!  
La nomo!

**LIU**

La nomo quan vu serchas  
nur esas konocata da me!

**TURBO**

La vivon ni salvis,  
la deliro desaparis!

**KALAF**

Vu savas nulo, sklavino!

**LIU**

Me savas vua nomo...  
Ma esas grandega plezuro  
mantenar olu sekreta  
ed esar la unika proprietanto!

**TURBO**

Kordoligez elun! Tormentez elun!  
Por ke elu parolez! Por ke elu mortez!

**KALAF**

Chere vi pagos elua lakrimi!

Chere vi pagos elua lakrimi!

**TURANDOT**

(*A la soldati*)

Kordoligez ilun!

**LIU**

Sioro, me ne parolos!

**PING**

La nomo!

**LIU**

No!

**PING**

La nomo!

**LIU**

Me, vua servistino, suplikas pardono,  
ma me ne povas obediar vu! Aye!

**TIMUR**

Pro quo vu krias?

**KALAF**

Liberizez elun!

**LIU**

No... no... nula plusa krio!

Li ne dolorigas me!

No, nulu tushas me.

(*A la soldati*)

Durez... kovrez mea boko  
por ke lu ne askoltez me!

Me ne povas rezistar plusa tempo!

**TURBO**

Parolez! Ilua nomo!

**TURANDOT**

(*A la soldati*)

Desligez elun!

(*A Liu*)

Parolez!

**LIU**

Preferinda la morto!

**TURANDOT**

Qua fortigis tante multe  
vua kordio?

**LIU**

Princino, la amoro!

**TURANDOT**

Ka la amoro?

**LIU**

Granda amoro sekreta, ne konfesita,  
tante granda, ke ta tormenti  
mem esas dolca por me,  
pro ke oli esas ofro a mea sioro...  
Pro ke kun mea silenco me donas a lu,  
me donas a lu vua amoro...  
Me igas vu esar di lu, princino,  
e me omnnon perdas!  
E me omnnon perdas!  
Mem la neposibla espero!  
Kordoligez me! Tormentez me!  
Tormentez e dolorizez me!  
Aye! Kom maxim granda ofro  
di mea amoro!

**TURANDOT**

Arachez la sekretajo!

**PING**

Advokez Pu-Tin-Pao!

**KALAF**

No! Maledikita! Maledikita!

**TURBO**

La mortigero! La mortigero!  
La mortigero!

**PING**

Elu tormentesez!

**TURBO**

Tormento! Yes! La mortigero!  
Elu parolez! Tormento!

**LIU**

Me ne povas rezistar pluse!  
Me timas me ipsa!  
Lasez me pasar!

Lasez me pasar!

**TURBO**

Parolez! Parolez!

**LIU**

Yes, princino, askoltez!  
 Vu, cirkondita da glacio,  
 vinkita da la granda flamo,  
 mem vu amoros lu!  
 Ante la jernesko,  
 fatigita, me klozos mea okuli  
 por ke lu durez vivar...  
 por... por ne plus vidar lu!  
 Ante la jernesko,  
 fatigita, me klozos mea okuli  
 por por ne plus vidar lu!

*Subite, per rapida movo, Liu deprenas la poniardo di apuda soldato e suocidas. Dum ke elua vivo extingesas, elu amoroze regardas la princulo.*

**TURBO**

Parolez! Parolez!

La nomo! La nomo!

**KALAF**

Ho! Vu esas mortinta, vu esas mortinta!  
 Mea kara Liu!

**TIMUR**

Liu! Liu! Staceskez! Staceskez!  
 Esas la klara jernesko matinala!  
 Esas la auroro, kara Liu...  
 Desklozez la okuli, blanka kolombo!

**PING**

Staceskez, oldulo! Elu esas mortinta!

**TIMUR**

Ho! Hororoza delikto!  
 Ni omna pagos la preco!  
 Elua anmo tormentita,  
 elua anmo venjos elua morto!

**TURBO**

Ombro doloranta, ne esez maligna a ni!  
 Ombro iracigita, pardonez, pardonez!  
 Ombro doloranta, ne esez maligna a ni!  
 Ombro iracigita, pardonez, pardonez!

**TIMUR**

Liu... boneso!  
 Liu... dolceso!  
 Ho! Ni marchez kune itere,  
 tale, unionita nia manui!  
 Me savas adube vu iras,  
 ma me sequos vu  
 por reposar apud vu  
 dum la granda nokto,  
 la nokto sen jornesko!

**PING**

Ho! Unesmafoye...

**PONG**

Hike, en la internajo vekis...

**PANG**

Ta mortinta yunino...

**PING**

... me ne vidas la morto kun sarkasmo!

**PONG**

... la evoza mekanismo,  
 la kordio, men tormentas!

**PANG**

... esas tam pezoza kam  
 petro en mea kordio!

**MULIERI**

Liu, boneso, pardonez, pardonez!

**OMNI**

Liu, boneso, Liu, dolceso,  
 dormez! Obliviez!  
 Liu, poezio!

+++++  
 + Hike la Maestro Puccini mortis. +  
 ++++++

**KALAF**

Princino di la morto!  
 Princino di la glacio!  
 De vua tragedioza cielo  
 decensez a la tero!  
 Ho! Levez la velo!

Videz, videz, kruela,  
ta purega sango  
varsita da vu!

*Ilu proximeskas a Turandot ed arachas elua velo.*

**TURANDOT**

Quale vu audacas, exterlandano!  
Me ne esas homa.  
Me esas la filiino di la Cielo,  
libera e pura.  
Vu embracas mea kolda velo,  
ma mea anmo esas ibe, supere!

**KALAF**

Vua anmo esas supere,  
ma vua korpo esas proxima!  
Per mea ardoroza manui  
me opresos la ora franjo  
di vua stelizita vesto.  
Mea vibranta bokon  
me opresos kontre vu...

**TURANDOT**

Vu ne profanacez me!

**KALAF**

Ha! Sentar vu vivanta!

**TURANDOT**

Adretroe!

**KALAF**

Sentar vu vivanta!

**TURANDOT**

Adretroe!

**KALAF**

Sentar vu vivanta!

**TURANDOT**

Vu ne profanacez me! Vu ne profanacez me!

**KALAF**

Vua glacio esas falsa!

**TURANDOT**

Adretroe!

**KALAF**

Falsa glacio!

**TURANDOT**

No, nulate tempe ulu esos mea mastro!

**KALAF**

Me volas ke vu esez mea!

**TURANDOT**

La tormento di mea avino  
ne eventos itere! No, no!

**KALAF**

Me volas ke vu esez mea!

**TURANDOT**

(*Kalaf kisas elu*)  
Ne tushez me, exterlandano!  
Lo esas sakrilejo!

**KALAF**

No, vua kiso donas a me la eterneso!

**TURANDOT**

Sakrilejo!  
Quo eventas a me?  
Vinkita!

**KALAF**

Floro mea!  
Ho! Mea floro matinala!  
Floro mea, ma vun respiras!  
Vua lilia mami...  
... ho, tremas an mea pektoro!

**MULIERI**

Ho!... Ho!... Ho!

**KALAF**

Me ja sentas vu dolce esvanar,  
blanka, en vua arjenta kovrilo!

**TURANDOT**

Quale vu vinkis?

**KALAF**

Ka vu ploreskas?

**TURANDOT**

Esas la auroro! Esas la auroro!...  
 Esas la auroro! Turandot deklinas!

**PUERI**

Esas la auroro! Lumo e vivo!  
 Omno esas pura! Omno esas santa!  
 Dolceso en vua ploro!

**VIRI**

Esas la auroro! Lumo e vivo! Princino,  
 dolceso en vua ploro!

**KALAF**

Esas la auroro! Esas la auroro!  
 E la amoro... e la amoro  
 naskas kun la suno!

**TURANDOT**

Nulu povez vidar me,  
 mea glorio finesis!

**KALAF**

No! Nun komencas!

**TURANDOT**

Me esas shamita!

**KALAF**

Milakro! Vua glorio  
 brileskas danke la unesma kiso,  
 danke la unesma ploro!

**TURANDOT**

Di la unesma ploro... ho...  
 Di la unesma ploro!  
 Yes, exterlandano,  
 kande vu arivis,  
 kun angoro me sentis  
 la fatala fremisado  
 di ta suprema malajo.  
 Plurin me vidis mortar por me!  
 E me lin desprizis;  
 ma vu, vun me timis!  
 Esis en vua okuli  
 la lumo di la heroi.  
 Esis en vua okuli  
 la tota certeso...  
 E pro to me odiis vu  
 e pro to me amoreskis vu,

hororigita e nedecidema  
 inter du egala selekti:  
 vun vinkar o vinkesar da vu...  
 E me vinkesis... Ho! Vinkita,  
 ne pro la granda defio,  
 ma pro ta varmeso qua venas a me de vu!

**KALAF**

Vu esas mea! Mea!

**TURANDOT**

Lon esis vua deziro.  
 Nun ja vu savas omno.  
 Ka vu volas plu granda vinko?  
 Forirez, exterlandano, kun vua misterio!

**KALAF**

Ka mea misterio?  
 Me ne plus havas olu! Vu esas mea!  
 Vu tremas se me tushas vu,  
 vu paleskas se me kisas vu,  
 povas perdar men ma se lon vu volas!  
 Mea nomon e mea vivon  
 kune me donas a vu.  
 Me esas Kalaf, filio di Timur!

**TURANDOT**

Me savas vua nomo! Me savas vua nomo!

**KALAF**

Mea glorio esas vua embraco!

**TURANDOT**

Askoltez! Sonas la trumpet!

**KALAF**

Mea vivo esas kiso da vu!

**TURANDOT**

Atencez! Esas la kloko!  
 Esas la kloko! Esas la kloko!

**KALAF**

Me timas nulo!

**TURANDOT**

Ho! Kalaf, venez  
 avan la populani kun me!

**KALAF**

Vu esas ta qua vinkis!

**Duesma ceno**

*Exterajo di la palaco imperiala. En la supra parto di granda  
perono esas la trono di la imperiestro,  
cirkondata da la kortani.*

**TURBO**

Dekamil yari vivez  
nia imperiestro!

**TURANDOT**

Augusta patro,  
me konocas la nomo di la exterlandano!  
Ilua nomo esas... Amoro!

*Kalaf embracas Turandot*

**TURBO**

Amoro!  
Ho, suno! Vivo! Eterneso!  
La lumo di la mondo esas la amoro!  
Ridez e kantez ye la suno  
nia infinita feliceso!  
Glorio a vu! Glorio a vu! Glorio!

**F I N O**



**Giacomo Puccini, 1923**

*Tradukuro aden Ido da Fernando Tejón.*

## Klasika mondo

### De domestica religione



Lararium

Patricii romani mortuis cultum tribuebant quia animas inmortales credebant. Primus pater qui gentem constituerat pro deo familiari habebatur, suique nepotes semper eum colebant. Maiorum animae domum familiamque protegebant.

Sacra domestica in ipsa domo agebantur. Romanae domi atrium habebant in quo "lararium" cum ara erat; in ea ara semper focus patrius ardebat. In larario etiam Larum et Penatum imagines erant, quibus dona oferebantur; nam dei "Lares" et "Penates" familiae favebant.

Ipse paterfamilias domesticam religionem colebat, deisque suae familiae rite sacra faciebat et honores tribuebat. Cum eo apud aras uxor, filii, filiae servique aderant.

Primum plebeii domestica religione carebant sed agrestes deos vel "numina" adorabant. Praesertim dea Ceres semper eis amata fuit. Etiam Pales colebatur eiusque honori fanae Palilia celebrabantur, in quibus magni foci inter omnium laetitiam ardebat.

Plebei tamen in reipublicae temporibus etiam domesticam religionem statuerunt et abhinc suos deos familiares coluerunt.

### De publica religione

Praeter deos familiares, Romae non solum plebeii sed etiam patricii multos deos et numina adorabant. Romulus et Remus pro urbis Laribus habebantur; Iuppiter, Iuno et Minerva "Trias capitolina" constituerat; omnes in Capitolio monte colebantur. Agricolae Sterculi, Vervactoris, Satoris et variorum deorum numina in diversis agri laboribus invocabant.

Cum populus a numinibus beneficia accipere cupiebat, ad eorum honorem supplicationes et sacrificia faciebat. Primo autem auguria capiebantur.

In supplicationibus flamen rituales formulas supplici indicabat, qui, capite operto, eas iterum apud aras dicebat.

In sacrificiis hostia aut victima ad altaria ducebantur. In eius capite "salsa mola" et "infulae" positae erant. Victimarius a flamine quaerebat: "agone?" Tum flamen, capite cum toga operto, "hoc age" respondebat, et cito victimarius secure aut cultro victimam inmolabat. Postea aruspices exta examinabant et haec, si propitia erant, urebantur.

Sed popularissimae celebrationes feriae et ludi fuerunt.

Feriae stativae quotannis celebrabantur et praecipue institutae sunt quia populus deos propitios facere aut maleficia depellere cupiebat. Omnium feriarum antiquissimae fuerunt Lupercalia in Februario mense, Palilia in Aprile mense; famosissimae Saturnalia in brumali solstitio.

Ludi honori deorum instituebantur. Aediles theatrum, "circenses" et varia spectacula populo praebebant. Antiquissimi fuerunt Ludi Ceriales in Aprili mense, honori Cereris instituti, et Ludi plebeii in Novembre mense; popularissimi Ludi Magni etiam dicti Ludi Romani, in Septembre mense, Iovis honori.

**Ferdinandus Meles.**

## Ludeyo

### Sudoku (数独)

Yen plusa sudoku-i ne desfacile solvebla. En singla rango vertikala e horizontala esas omna nombri de 1 til 9, do nula numero repetetas en singla lineo. Pluse esas non quadrati cirkondata da larja linei nigra, en singla quadrato anke esas omna nombri de 1 til 9.

Unesme solvez ta du facila sudoku-i:

	3					7	4	
7	6	5			8			
			7			3		
4		7		5		8		
	8	4				7	2	
	9	3						
4				9	3			
5	9	6		7		1		
		5		4	2			

		6			4		3	
1					2		5	8
	5					2		
3		9					5	
	2	4		3	6			
8						9	4	
			3			8	4	7
			4	7				5
7		8	6	1				

Duesme yen ta sudoku-i plu desfacila kam le antea:

			2			7		
4		8	7					
	2	6	7					
				8		9	5	
						6		
2				9	3	8		4
5				4				
	1	5	8					3

	7	2						4
8	9					7		
		9					6	
			3					
5		4						
6	8			4			7	5
		5			6	2		
4				2				
	2			4	5	8		

Vizitez [www.sudoku.com](http://www.sudoku.com) por pluse savar pri sudoku-i.

**Artiklo da Fernando Tejón, ISH-anon**

## Rideyo



Fernando Tejón.

## Averto lektenda pri la autoro-yuri

La revuo **Adavane!** licencesas sub "Creative Commons License" :

### Rikonoco - Nekomercala 3.0



**Vu darfas libere:** Kopiar, dissendar, publikigar e krear verki derivata de ta verko.

**Ma oblige vu aceptas la sequanta kondicioni:**

**Rikonoco:** Vu mustas mencionar la nomo di la originala autoro.

**Nekomercala:** Vu nulakaze darfus uzar ta verko komercale.

Se vu publikigas parto o la totala verko irgaloke lore vu mustas insertar en olu la kondicioni di la licenco di la verko. Ula ek la kondicioni di la licenco povas ne esar aplikenda se la proprietanto de la autoro-yuri permisas lo.

**Averto:** Ta rezumo ne esas licenco. Olu esas simple texto facile komprenebla. La kompleta licenco esas lektebla en la interretala pagino: <http://creativecommons.org/licenses/by-nc/3.0/legalcode>

Ta qua acendas sua velo  
kun la flamo di la mea  
ne furtas mea lumo  
ma kune ni lumifas duople.



## Adio !

La editero gratitudas la valoriza helpo di la kunlaboranti e la susteno di la afabla lekteri. Adavane! proprietas nula artiklo publikigita ma olua autoro o legala proprietanto. Voluntez rapportar irgaspeca erori che Adavane!

Til la duadek e kinesma numero, lektebla  
de la unesma di la monato januario 2008.



**Editerio Krayono uzas libera programi che GNU/Linux.**

